

Broj: 05-02-2-247/2023
Sarajevo, 26.05.2023. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

FEDERACIJA BOSNE I HERCEGOVINE
PARLAMENT FEDERACIJE BIH
DOM NARODA
n/r sekretara, Izmir Hadžić

Primljeno: 30-05-2023			
Org. jed.	Broj	Priloga	Vrijednost
05/2	-02-	133	123

PREDMET: Odgovor na inicijativu zastupnika Zahiragić Harisa, dostavlja se
VEZA: - akt Vlade Federacije Bosne i Hercegovine broj: 03-04-602/23 od 22.05.2023. god.;
- akt Doma naroda Parlamenta Federacije Bosne i Hercegovine broj: 05/2-02-133/23 od 18.05.2023. god.

Federalna uprava civilne zaštite (u daljem tekstu: FUCZ) je preko Vlade Federacije Bosne i Hercegovine zaprimila Inicijativu zastupnika Zahiragić Harisa u Domu naroda Parlamenta Federacije Bosne i Hercegovine, broj i datum navedeni u vezi, koja je upućena Vladi Federacije Bosne i Hercegovine i kojom se traži „da se odmah i bez odlaganja upute svi raspoloživi ljudski i materijalno-tehnički kapaciteti u općine USK pogođene poplavama, kao i u općine na području entiteta RS – posebno u mjesne zajednice gdje žive povratnici koje su u značajnoj mjeri pogođene poplavama, a kako bi pomogla tamošnjim lokalnim vlastima. Takođe zastupnik Zahiragić ovom inicijativnom „traži od Vlade Federacije Bosne i Hercegovine da Vladi USK uputi i novčanu pomoć u iznosu od 5.000.000 KM“.

Vežano za nadležnost FUCZ u oblasti zaštite i spašavanja od prirodnih i drugih nesreća ljudi i materijalnih dobara tokom akcija zaštite i spašavanja, kao i pri otklanjanju i ublažavanju štetnih djelovanja i posljedica prirodnih i drugih nesreća, a kada je u pitanju stanje prije i tokom prirodne nesreće-poplave u Unsko-sanskom kantonu, ova Uprava je 15.05.2023. godine u stanje pripravnosti stavila sve svoje uposlenike, koji su ujedno i pripadnici federalnih specijaliziranih jedinica civilne zaštite, te su obavljani slijedeći poslovi, zadaci i aktivnosti:

-Odmah od jutarnjih sati 16.05.2023. godine stavljeni su u funkciju zaštite i spašavanja ljudi i materijalnih dobara od posljedica poplava na području Unsko-sanskog kantona dva deminerska tima iz Bihaća (10 pripadnika sa terenskim vozilima), a koji su se stavili na raspolaganje Gradskom štabu civilne zaštite u Bihaću. Upućivani su na nekoliko najugroženijih lokacija gdje su čamcima vršili dostavu osnovnih životnih namirnica, vode, lijekova i dr. stanovništvu u poplavljenim područjima, te su u saradnji sa pripadnicima lokalnih službi civilne zaštite obavljali i druge poslove pomoći stanovništvu ugroženom od poplava, izgradnji nasipa, zaštiti objekata, prevozu vreća za pijesak, opreme i drugo.

-Uposlenici FUCZ na lokacijama u Sarajevu su dežurali i vršili administrativno-tehničke poslove i podršku operativnim timovima, te obavljali druge poslove i zadatke potrebne za pravovremenu reakciju i realizaciju svih aktivnosti i radnih obaveza koje su u nadležnosti ove Uprave tokom akcija zaštite i spašavanja ljudi i materijalnih dobara od posljedica prirodnih nesreća (kontrola i priprema materijalno-tehničkih sredstava i opreme (čamci, pumpe i drugo) za spašavanje na vodi, bager caterpillar i potreban broj terenskih i teretnih motornih vozila). Izkoordinirane su i dostavljene Ministarstvu sigurnosti BiH i međunarodnim organizacijama potrebe i prioriteta stanovništva ugroženih općina/gradova u Unsko-sanskom kantonu, a koje su hitno reagovala te sredstva i opremu isporučile na ugroženo područje (TIKA-čamci sa motorom i crijeva za muljne pumpe, UNHCR-isušivači, UNFPA-kompleti za higijenu, UNICEF-jakne, trenerke, rublje, čarape, cipele, čebadi i dr.)

-FUCZ je po hitnom zahtjevu Grada Bosanska Krupa dva puta odgovorila na isti dostavljajući Gradskom štabu civilne zaštite 10 muljnih pumpi, 20 pari čizama i 20 isušivača vlage.

-Ova Uprava je takođe kontinuirano koordinirala i pratila stanje na ugroženom području i nudila pomoć pripadnika federalnih specijaliziranih jedinica civilne zaštite (za spašavanje na vodi, za spašavanje pod vodom i druge). O stanju na terenu redovno, u skladu sa Federalnim planom zaštite i spašavanja je informisan Premijer i Vlada Federacije Bosne i Hercegovine, te članovi Federalnog štaba civilne zaštite i drugi organi i institucije, uključujući i medije, Ministarstvo sigurnosti Bosne i Hercegovine, kao i Republičku upravu civilne zaštite RS.

-Nakon informisanja Vlade Federacije Bosne i Hercegovine o stanju u poplavljenim područjima u Federaciji Bosne i Hercegovine dana 16.05.2023. godine, FUCZ je predložila Vladi Federacije Bosne i Hercegovine da u okviru raspoloživih sredstava "Tekuće rezerve Vlade Federacije Budžeta Federacije Bosne i Hercegovine za 2023. godinu" izdvoji dio finansijskih sredstava za pomoć općinama, odnosno gradovima i Unsko-sanskom kantonu koji su zbog katastrofalnih poplava proglasili stanje prirodne nesreće na svojim područjima. Nakon razmatranja i prihvatanja predmetne Informacije, Vlada Federacije Bosne i Hercegovine je donijela Odluku o odobravanju izdvajanja sredstava iz Tekuće rezerve (V. broj: 709/2023 od 19.05.2023. godine), kojom su Gradu Bihaću, Gradu Bosanska Krupa i Općini Sanski Most odobrena finansijska sredstva u iznosu od po 150.000,00 KM i Općini Ključ finansijska sredstva u iznosu od 50.000,00 KM. Ova Uprava je, u okviru zaduženja Vlade Federacije BiH, odmah provela sve potrebne procedure i izvršila prenos, odnosno uplatu odobrenih finansijskih sredstava ugroženim gradovima i Općini Ključ.

Obzirom da je u navedenim gradovima i općinama, kao i na području Unsko-sanskog kantona, na snazi „stanje prirodne nesreće-poplave“, FUCZ će nastaviti pratiti stanje na ugroženim područjima i na svaki zahtjev Kantonalnog štaba civilne zaštite Unsko-sanskog kantona pokušati odgovoriti i konkretno djelovati sve dok se ne stvore osnovni uslovi za život i rad ugroženog stanovništva.

Federalni štab civilne zaštite i FUCZ će, takođe u skladu sa propisanom procedurom, sagledati procijenjenu materijalnu štetu na poplavljenim područjima i u okviru raspoloživih finansijskih sredstava iz posebne naknade za zaštitu i spašavanje odobriti odgovarajući iznos, te Vladi Federacije BiH predložiti da u okviru raspoloživih budžetskih sredstava takođe odobri određen iznos.

S poštovanjem,

**P. O. VLADE FEDERACIJE BIH
POMOĆNIK DIREKTORA**

Murat Baručija



Dostaviti:

1. Naslovu,
2. Vlada Federacije Bosne i Hercegovine, na znanje,
3. Federalno ministarstvo finansija/financija, na znanje,
4. Federalno ministarstvo raseljenih osoba i izbjeglica, na znanje,
5. a/a